

四庫全書

集部

欽定四庫全書

樂全集卷二十八

宗 張方平 撰

表狀

賀皇帝加尊號表

三推修籍禮畢於青壇兆姓樂推恭上乎顯冊天人協  
契夷夏胥歡

中謝

恭惟尊號皇帝陛下寶玉紹圖淵珠

在握稽乾文而布政鈞妙用以為方圓覆九區大冲羣  
性雖上德不有故人無能名在後聖異文必功稱乎號

是以帝堯則天之大皇軒體道之元加諸寶章未浮睿  
致臣心傾宸極身繫陪京莫伸率舞之誠徒慶嘉亨之  
會

賀皇太后加尊號表

臣庶等以陛下德對天儀功邁古烈奏誠丹陛贊國鴻  
休爰此吉辰誕膺寶冊宗廟增慶華夷共歡

中謝伏以

皇太后陛下厚載無疆裁成百度躋含靈於仁壽浹和  
氣於清寧教始正家雅憲邁乎文德禮成見廟故事盛

於和熹大業著於升平陰隲存於造化惟茂功之所被  
豈徽號之能殫臣適遠龍墀叨司麟籥想盛儀而心驚  
望宸極以魂飛

光獻皇后上仙慰表

伏觀遺誥太皇太后奄違盛世聞誥號擗糜潰五情伏  
惟皇帝陛下至情大孝哀慕深切臣退伏田廬不獲陪  
位宮庭不任摧殞之至

光獻皇后靈駕赴山陵慰表

伏承大行太皇太后靈駕發引赴山陵者大升即遠萬國同哀伏惟聖情永懷攀慕大行太皇太后陰功庇世神御賓天尊極三朝實積貽謀之慶孝刑四海詎勝銜恤之深臣退伏鄉廬阻陪班位瞻望莫及殞咽椎心

先帝上昇慰表

上天降禍大行皇帝奄棄萬國悲纏穹壤痛貫華夷奉諱哀號罔知所措中謝恭惟皇帝陛下性於仁孝罹此艱虞哀慕切深中外悸恐願思社稷之大計無徇曾閔

之私哀臣以老病不獲奔赴闕庭無任哀痛感慕激切  
屏營之至

第二表

伏以大行皇帝奄棄萬國哀纏中外痛貫神人奉諱悲  
號擗踊無任中謝恭惟太皇太后陛下義重天屬恩深  
母儀罹此艱憂永懷痛悼願為無窮之計少割難忍之  
慈

第三表

伏以大行皇帝登遐遠近奔赴朝夕號臨況臣昔嘗備位二府雖老家居猶當躬詣闕庭以盡哀慕頃以垂老久病兩目生翳起坐須人雖欲勉強其道無由慙負哀痛罔知所措

皇帝登極賀表

伏奉制書今月五日皇帝陛下嗣登寶位纘服先猷中外聳觀華夷同慶

中謝

恭惟皇帝陛下英風冠古世德

在民煥乎天日之姿卓有祖宗之烈民心所在神詭自

歸如天作春萬物有向榮之意如日出地四海無遁照  
之心眷茲神人永有憑奉臣以老病不獲奔詣闕廷無  
任歡喜踊躍激切之至

賀太皇太后同聽政表

伏奉今月五日制書太皇太后臨朝聽政者天覆地載  
八方以寧春生秋成萬物乃遂民心既定國步自安

中

謝

恭惟太皇太后陛下轉導兩朝儀刑四海襲治世之  
故事繼先后之永圖屬茲難疚之中實負安危之望共



聞大政勉副誓言人神有依華夷須賴國之大計萬世以昌

慰皇太后表

大行皇帝奄棄萬國奉諱之日哀殞忘生成服以來擗踊無地中謝恭惟皇太后配德宸極助治宮闈崩坼之憂既下同於萬宇攀號之痛又身先於六宮臣以老病不獲奔赴闕庭無任哀痛感慕激切屏營之至

慰皇太妃表

大行皇帝奄棄萬國洪覆圯裂羣生震搖凡有識知舉  
增號慕中謝恭惟皇太妃奉侍朝夕左右聖神遽罹下  
席之憂永抱終天之痛

賀皇太后表

伏奉制書今月五日皇太后光奉國章誕膺冊禮凡在  
臣妾知有依歸中謝恭惟皇太后殿下內德茂於先朝  
母道隆於嗣聖恭儉之美上繼周之姜任孝慈之風下  
掩漢之馬鄧豈獨盡天下之養蓋將明王化之先盛禮

既行多方同慶

賀皇太妃表

皇太妃誕膺令典受冊內朝盛禮傳聞四方同慶  
中謝  
恭惟皇太妃功書女史德配周南早以虞嬪之休遂儲  
堯母之慶坐論婦禮既師表於六宮誕生聖明實本支  
於萬世恭聞盛禮實慰羣心

賀皇太后受冊表

致六宮之肅雍備四星之光耀國章畢舉實繫中外之

心陰教益明式顯廟朝之重

中謝

恭惟皇太后同德聖

期儷尊宸極成周之盛任如繼於徽音東漢方隆陰馬  
昭於內則式陳寶冊上正母儀普率承風抃蹈胥悅臣  
久違京闕退伏田廬聞命有初為國同慶

### 賀皇太妃表

盛禮斯成徽章式備國之慶事天下歡心

中謝

伏惟皇

太妃地重星闈德隆宸極重光累盛上參中壺之榮積  
德累仁允穆普天之望

慰慈聖光獻皇后神主升祔表

伏承慈聖光獻皇后神主升祔太廟禮畢者因山復土已掩於下宮祔廟安神肇開於拓室宸衷追慕綿寓同

懷

中謝

伏惟慈聖光獻皇后配極居尊俎天為大對勲

華之盛旦越任如之徽音國體端嘉功出九人之上孫謀丕顯治超三代之前展龍駕以賓升復龜臺之舊御寢園載肅虞輅初迴昭穆有嚴式序宗枋之重烝嘗是享永惟配帝之隆德性純深孝思篤至四海為養實由

來祭之恭萬民以和本自國親之教臣忝從朝舊退伏  
鄉廬徒望庭壚莫陪班列不任慘切之至

賀聖躬痊復表

伏承聖躬康復已於三月一日御紫宸殿視朝者擁全  
衆福臨聽萬機含生與聞舞手相慶

中謝

恭惟尊號皇

帝陛下丕承駿命光宅永圖上全虞舜之聰明中盡周  
文之抑畏雖甚盛德未嘗輒安將大有為無敢自暇至  
若一穀不登則憂見於色一夫不獲則慮形諸心于夙

于宵以諮以訪僅踰三紀常御太和茲極神明之勞偶  
爽晦明之適然而天地敷佑祖宗降休百靈陰相於前  
萬俗精虔於下粹氣來復淵衷寢清保社稷無疆之期  
為朝廷莫大之祝臣早從外補越在西涯第思宸宇之  
深嚴阻預簪紳之蹈躍

賀冊貴妃表

得本州進奏院報今月三日貴妃受冊禮畢者徽章有  
煒茂典聿修臣子之心中外胥慶

中謝

恭惟尊號皇帝

陛下丕承寶構光闡皇圖凡議禮文必考本朝之故事  
誕孚德度舉協前王之令猷疇壺掖之賢明成家邦之  
風化若時吉日備禮大廷敦厚人倫足致闕雎之應裁  
成內治永標彤管之光臣限守郡符方遙象闕徒心馳  
于宸極阻手舞于天墀謹差都教練使張遵道奉表詣  
闕稱賀以聞

代中書賀壽星見表

司天監狀奏今月十九日戊申其夜五更五點後于丙



位瞻見壽星出見赤而光大者秋氣方清曙光微動爛  
然珠彩宛在丙方考日官之獻占知睿筭之無競中謝  
伏以三辰垂象所以示人五福敷言莫先惟壽觀景祥  
於南極驗愷悌之萬年恭惟尊號皇帝陛下寶命在躬  
乾圖紹統治民祇懼事帝寅威故鑒祐於有仁用永錫  
於難老惟享國之永若商之中高願當天而王如古之  
巢燧臣等愧非一德忝列三司覩此休符倍萬忻慶

謝賜御飛白書表

今月五日伏蒙聖恩賜臣御飛白書一軸者仰拜綸言

甫啟緘滕之秘恭瞻宸翰恍驚輝照之臨

中謝

臣聞書

之後竒法傳飛白得諸心而方妙應於手以如神惟我  
太皇若時多藝高出肇昔孰為擬倫恭惟尊號皇帝陛  
下繼聖恢圖無為御宇顧萬機之臻靖咨八法以宣精  
祖則茂昭睿功允緝因齋居之多豫灑逸筆以為娛以  
臣久塵侍索之華近被于藩之重特加寵錫曲示眷私  
俯僂以觀徘徊增惕重有同於分器榮實過於笥衣神

物護持恐難留于私室世家傳保當大庇於宗門臣方  
迫嚴涂無繇躬謝

謝賜御書表

臣伏蒙聖恩賜親書一幅天語溫純煦若春陽之景宸  
毫璨麗煥如星斗之精褒逾華袞之章捧過鴻鈞之重  
臣道原殊淺學殖久蕪早塵兩禁之游遂玷三朝之遇  
陛下宸襟縱邁天稟濬明妙萬物以為神乘六龍而比  
健豈臣庸陋得望清光灑潤及於蕭斯委照通於鄙隙

逢時之渥傳後為榮仰服寵靈深淪骨髓

進慶歷編勅表

恭聞聖人之於法也揆時設禁察失建防律令統於本  
原詔教縫其漏隙世輕世重參制呂刑之權新典平典  
互存司寇之職然則通其變者未嘗使倦歸於治者不  
必相沿更化適宜由來尚矣臣等

中謝

竊以宋興受命

垂及百年制勅之文累經編定造邦則綱目粗舉繼世  
則禁約彌周故刑統輔乎建隆農田析於景德附令輕

常憲之犯減定省中覆之煩要取便人迭為救弊其間  
執文生意吏所不免緣令興詐人所必為語不直宣則  
奏請生於未曉法雖曲處故比例興於一時由是報讞  
浸多文書彌積官雖行下民罔究知旁緣為姦承用差  
駁網逾密而禽駭策雖弊而馭勞必待刊修乃能折中  
伏惟尊號皇帝陛下燭知治本茂建民中既清問於羣  
工思更始於多辟而舊條浩廣後令煩拏或月異而歲  
不同或小得而大有失矧乃俗無定化法貴善更不徇

古以礙今不執此而妨彼譬夫調瑟易柱順燥濕而扣  
音虞機省括度高下而求獲乃頒明命改緝懿綱仍詔  
臣等博舉衆僚並咨先例置司率屬舉要申凡於是以  
尚書屯田員外郎臣奕等刪正其文翰林學士臣某等  
詳處其當臣昌朝臣育典總其任尋據天聖編勅為始  
下盡慶歷三年續降宣勅凡得四千七百六十五條極  
慮研精彌年論次因事標目准律製篇槲除重複揚摧  
輕重增所宜立周所未詳一詔而該數罪者從類析科

數勅而申一事者併文示簡向以損益未定首末或乖  
須訖纂修方咨處可露奏前上俞報實頒又詳天聖編  
錄之時勅不著年卷無先例遂使法家無指用之限諸  
條有疊出之文今每勅繫年存舊體也先卷發例省煩  
文也其言某年月日勅者則盡如元降言某年月日勅  
詳定者則微加修潤言臣等參詳新立者乃是衆議建  
明務合大中庶全體要又念折杖之法創始本朝上聖  
卓行前王未悟故取自刑統冠於本章且俾羣吏曉知

王制明白其中書門下樞密院聖旨劄子批狀係今來纂錄者悉改曰宣勅總一千七百五十七條離為十二卷併總例一卷目錄三卷又取勅內汎行約束者為續附令勅一卷及錄到續降赦書德音三卷合為一部如得允當即乞特降勅命與刑統令式及先編附令勅一路一州一縣勅兼行蓋以窒詆欺之塗略苛細之弊義歸畫一人得共規文淺則用者明語約則該者廣由天地之化確然易知侔江海之流大而難犯若使吏能明



習官謹奉行不為惠於法中不游情於法外庶可杜塞  
奇請追庶獄之號平銷戢爭心致黎苗之遷善臣等謬  
膺遴選殊慙大猷探理略以服勤惕奏期之淹晚粗終  
研削少佐例成或許頒行仍乞以慶歷詳定編勅為目  
其新編勅共二十卷謹隨奏上進以聞牒奉勅宜令崇  
文院雕印頒行

謝賜熙寧編勅表

伏蒙聖慈賜臣熙寧編勅一部者伏以建邦之治本原

在乎典刑禁民為非綱紀繫乎法令屬當平世簡用祥

刑式助四維允成三德

中謝

恭惟皇帝陛下體天為大

如日之中燭於象表之微制此天下之動俯觀時務旁  
察人情時惟適以為宜事何久而不敝貞夫一者百慮  
可以同歸變而通之萬民於茲不倦故講求於往制俾論  
次於新書雷電合章金玉條理緬合大中之訓益昭欽  
恤之仁甫畢刊摹爰加頒賚臣幸緣近綴忝守輔藩方  
恭命以奉行思揚吏職復蒙恩於降賜永獲家藏

滑州謝賜新歷日表

王官底日考歷以正天端侯御奉時告朔而賦民政中

謝

伏以尊號皇帝陛下乾圖紹統寶數在躬推軒策於明堂五氣以治合舜時於方嶽七政以齊臣罷職禁林分符畿服捧新書于芝檢增舊戀于冀階

南京謝賜歷日表

居卿典歷太史序時憲治象於庶邦大王正於一統尊號皇太后陛下厚生著德大順御期撫節以推天元履

端而勤政始氣物惟叙機祥薦和爰頒朔於海寰俾示  
人於歲事臣忝由禁署分守陪京捧迎日之軒書切望  
雲於堯屋

秦州謝賜歷日表

清臺謹職俯畢於新書法座推恩亟行於諸夏撫封載  
遠拜賜為榮中謝恭惟尊號皇帝陛下乘正御乾順古  
敷化海以內外盡陶於太和天之後先率有以常應然  
猶命南北之正記昏明之期自始而終能究六家之法

惟疎與密具歸五紀之文序作歲言布為民事凡舟車之所逮且郡國之相維悉用頒宣庶令奉順而臣復從外補越在西隅會承詔檢之嚴得見辰猷之重謹當恪思睿訓昭諭編氓不獨示元聖授時之休抑亦知至仁生物之意

讓除諫官表

今月二十一日閤門領告勅一道授臣直集賢院知諫院事者膚短之材孤遠之迹選除忽及愧惕無涯 中謝

伏以國家分命百工並釐衆務惟茲諫職實裨治要自  
非素履約乎中道處議得其遠體詳曉事物該知典故  
有大制度能探沿革之本當大施舍能折損益之中苟  
塵獻替之地是貽朝廷之辱況今陛下勵精於上大臣  
宣力於下聽納不倦謀能並進是方輯明紀律式遏寇  
暴宜得通識上助有為衆材森如多士萃止上簡天眷  
豈少臣者儻陛下矜其愚而錫保全之造公朝體其介  
而敦愛育之仁許臣且以舊官就館供職上免曠官之

咎下逃十指之譏茲實由衷之私竊積聽卑之望

謝除知制誥表

伏奉制命蒙恩授臣右正言知制誥者槐庭給札甫上  
於奏篇星掖代言遽陪於景從躡進論思之秩預聞  
密之謨俯僂拜嘉兢凌失次

中謝

恭以邦家所重典誥

為先故廣延於翹英俾對司於明命尚書作詔任處機  
衡內史出方贊為爵祿蓋歷朝之極任為外廷之華階  
向非學本名家代推傑筆則何以發揮鴻業徊翔近班

體漢家深厚之辭演周公煩悉之誥訏謨定命鼓舞乎  
萬方除書德音竦動乎羣聽備諮訪乎政事專潤色於  
王猷必資東里之才取重西臺之望伏念臣斗筭微器  
樗櫟散材獨奮草茅之愚再舉方聞之目小冠宰邑式  
敷慈惠之經別乘贊藩無補中和之職無何被旨即追  
還臺陞處樂卿之丞留充諫省之缺赤墀伏奏曾未逾  
年右史記言仍偕備位自量未至兼此數官惟內罄於  
朴忠可少紓於官責汲黯之言多忤實荷優容鮑宣之



義少文粗存體要免譴斥之為幸曷恩榮之敢圖猥被  
寵甄遽承官乏內省而愧外言謂何此蓋皇帝陛下洪  
覆如天至仁育物修官以一乎統類施命以告乎方來  
思皇俊乂之才裁成溫雅之號詎宜輜淺玷此敷求謹  
當疏淪煩襟厲摩素業闕決六曹之議深務持平覲修  
四禁之規覲能謹職敢言論報蓋逌顛隲

西垣陳乞外補狀

臣幸以微才濫當書命去本朝而就州郡捨辭翰而趨

吏責蓋不獲已豈所願為臣堂有二親年向衰老母氏抱疾多歷年所自臣登仕再任涖中迎親就官樂其風土今來外制見有五員臣出領州餘足供職伏望聖慈許領江淮間一郡矧今疆場之戍未解中外之事頗繁萬一闕人選任誤及不惟自知愚懦實亦迫此私誠臨時有辭愆為臣之義遺親冒寵乖為子之方臣若旁有兄弟或下有子姪供養有託何憚奮身緣此區區尤不遑處仍恐物議不察臣誠以謂多事之時猥為便私之

請占掖垣之近職擇善地以自安臣乞解綸闈換一散秩若祕書學省東宮之官資清品高典藩亦重矧茲官號久不補除散要逋居願從臣始仰祈天造俯鑒愚衷戰汗屏營伏候勅旨

謝宣召入院充學士表

今日日翰林待詔劉文蔚至臣所居奉宣聖旨召臣入院充翰林學士星車傳命玉署參華才薄恩隆以榮為懼竊以學士之職盛於有唐本朝右文其選益重間蒙

訪逮得効論思地處深嚴絕為清近服四禁以謹職業  
詳七制以贊訓言諒匪通才豈當妙簡

中謝

伏念臣幸

緣儒服竊覲仕階濫肩四方之豪曷明三道之要大庭  
發策再矚帝輝東觀紬書亟游俊域荐塵事任粗守官  
箴內省顓蒙已塵賞拔豈謂皇帝陛下軫憐孤特矜芘  
拙艱記演綽之微勤陟浮鰲之近綴斗無挹酒之用鶴  
有乘軒之譏謹當自求履祥緬思典故體異風而申令  
當勵深辭瞻法庥以在顏勉承切問冀少圖於來效諒

奚報於鴻私

滁州謝上表

昨蒙聖恩授臣依前右諫議大夫知滁州軍州事已於  
十月初五日到任上訖近班就列早玷於清途便郡庇  
身復蒙於善地荷天之寵循分知優中謝臣緒閥單平  
材用疎短謬登詔選叨處仕途通籍朝闥濫巾儒館擢  
陞兩禁用踐羣司粗逃官尤曾微風迹比因病目不堪  
簿領之煩遂剖丹誠求還文翰之職清衷加恤慈旨垂

矜得就閒曹少安散質事介有無之迹議生疑似之間  
睿鑒孔昭朝論惟允領麾殊幸省已載競久依日月之光榮  
陪法從忽到淮山之上悅復塵寰值歲大穰與民同泰  
俯仰優足出處便安此蓋皇帝陛下一氣均和大圓廣  
覆動植之物並被生成之仁小大之臣咸荷保全之道  
矧在孤微之迹當叨任遇之恩拙守有常厚誣已辨敢  
不勤恤民瘼恪謹官箴冀勉樹於教條期少資於化育

江寧府謝上表

三月二十三日進奏院遞到官告勅牒各一道伏蒙聖恩授臣依前官充端明殿學士移就知江寧府仍放朝謝者已於四月十七日到任訖參華秘殿被寄名藩從便道以治行奉寬條而署事寵榮蕃集媿汗交流中謝

竊念臣世系單微天資蒙淺褊巾未久通籍為榮乘善養於羣材遂叨塵於顯列沾河漢之滋澤依日月之光華寢親戶牖之嚴備更臺閣之要物勝權而衡殆形過鑑以照窮久冒龍光倏罹箕舌仰繫能哲俯察所存寘

兩省之近班假一麾於便鄙危心未定渥命亟頒部屋  
照通陳根脈起垢疵悉蕩坯陶更新此蓋皇帝陛下大  
度開容至仁涵育鑒丹誠之不昧知拙守之有常申穆  
朝猷曲回天造禁帷密職復近穆清之塗方面通都俾  
當雄重之地敢不精心以慮來效是圖庶有獲於涓埃  
用酬恩於天地

服除再授端明殿學士兼龍圖閣學士給事中  
謝恩表



伏奉制命授臣某官者禮方終制恩許還朝入覲黼惟  
邈清光而在望登陪藻幄遙近綴以為榮

中謝

伏念臣

才匪通方器慙適用從鄉人之善者幼擇與遊玷國士  
之品題早塵上達荐承詔選遽躡仕階見推英俊之場  
周歷華要之地比繇禁署分領翰垣不圖釁罰之深靡  
究劬勞之報久纏病苦無望生全况晷景之不停悵几  
筵之已徹仰膺茂典俾復通班再趨戶牖之嚴仍處閨  
帷之密此蓋尊號皇帝陛下大圓周覆一氣均和軫塵

露之舊勤收箕斗之浮象匪遺輜曲同被範圍敢不進  
念竭忠退思寡過日月獻納庶盡近臣之規夙夜切磋  
以勵在公之節少期來效上答鴻私

除尚書禮部侍郎知滑州讓遷官表

伏奉制書以臣差知滑州特遷尚書禮部侍郎者旬服  
陪京首膺東眷春官小宰仍假寵名獎受有殊兢憂無  
措中謝臣論材謏薄語道迂疎親逢樂育之辰屢塞方  
聞之詔誤蒙恩記嘗歷事權向解禁局連紆州組契濶

江湖之遠流離歲月之賒近趨丹陛之嚴復預紫垣之  
近激揚懦氣仰奉清光伏遇國家示壯邦畿增崇屏衛  
郊甸屯兵慎擇臣守豈期玩印之咨首訪遺簪之舊遷  
貳六官之重用優三輔之行無鎮撫方面之勞有息偃  
鈴齋之樂論今地望雖體大而勢雄較昔官居本事稀  
而身逸過加賞利恐累典刑若非此際懇辭必啓後來  
僥倖況臣職忝殿幄官處瑣闥久塵侍從之華足領藩  
宣之寄曷煩麗澤方重左符伏望尊號皇帝陛下特寢

新恩許還舊秩往釐州務躬布詔條雖去君前稍違於  
戶牖顧居寰內何遠於本朝仰祈寬大之慈曲示保全  
之度俯回照鑒垂諒由衷輒干九死之誅冀完一介之  
守所有勅誥未敢祇受

知滑州乞免轉官劄子

臣伏奉勅告授尚書禮部尚書差知滑州近者朝議升  
曹滑等州為輔郡增置兵衛以壯王畿所遣守臣緣此  
誠重然滑州本實閒僻公事絕稀無宣力之煩非藉才

之地更起遷官之例恐開後倖之途又環都五州並為陪輔知州在任遷易不常必待加恩而行益滋干賞之濫況臣官叨兩省職居清近出當屏翰體亦非輕臣前日欲先陳論又慮涉於辭避故且受命須至上言伏望聖恩許臣只以舊官前去赴任慎重名器茲為治本在臣之分亦獲自安

謝遷禮部侍郎領輔郡表

臣某言伏奉制命以臣差知滑州特授臣尚書禮部侍

郎者近服建侯地升三轉中臺分次官貳六卿併荷褒

榮交深媿懼

中謝

臣世憑儒素天與朴忠幸遭重雍之

辰濫膺特起之詔造廟堂而干祿兼冀親甘輕藁鎖以  
獻言累迂聖問茂聞塵露之益空收箕斗之名頻煩寵  
章進點清貫嚮間闕於補郡方契濶以還朝重趨丹陛  
之華再預皁囊之綴喜從遐邇獲際近嚴嘿務安恬絕  
希僥倖會廟堂之深議崇畿甸之邇封盛修官儀推峻地  
望遄恤北門之舊首蒙左竹之咨謂密附日聞雖居重

寄而輕辭天仗亦動淵衷因假儀曹示優禁從露囊封  
而啓讓承汗號以難迴載省無功徒堅自訟此蓋伏遇  
尊號皇帝陛下曲垂睿覽俯暨寒蹤念昔誤知非緣黨  
援推今同類每異矜憐偶賜節以殿邦猶出綸而增秩  
敢不祇循條教恪佩訓詞往殫夙夜之誠少荅乾坤之  
造

免知益州表

今月十五日遞到告勅各一道伏蒙聖恩授臣端明殿

學士兼翰林侍讀學士尚書戶部侍郎知益州軍州事  
者左戶美官西區重寄敢期推擇俯及庸虛驚惶失圖  
進退無措

中謝

臣涉獵經術遭逢聖明越分踰能連階

累仕周旋侍從之職踐更清要之途風議無長猷為弗  
建向終直制擇守輔藩報政靡聞方積簡書之畏陟思  
逮下遽當方面之行地官亞卿坤維巨屏寵靈殊渥踟  
躑為增念臣父當傳老之年而臣抱終鮮之戚有息皆  
幼于宗弗蕃顧溫甘之所須豈晨昏之可舍惟拜嘉之



誠厚敢有覲以自居情所不安義亦何處伏惟尊號皇帝陛下宇宙同廣曜魄並明測遠方之民深期於鎮輯訪大廷之議誤致于簡掄聖治難逢私懷為迫敢期遠照俯及丹衷布朝家天地之仁徇臣子庭闈之志追寢成命選除通材他日捐生敢惜螳螂之臂此時反哺幸伸烏鳥之情輒竭寸誠仰祈洪造

免知益州劄子

臣伏蒙聖恩除臣端明殿學士兼翰林侍讀學士尚書

戶部侍郎知益州已具表辭讓章奏之文不盡誠悃敢披愚懇再黷天聰伏以益州方面至重朝廷委任推擇至精臣以庸虛猥當簡寄濫加崇秩榮兼近職揆才揣分忝冒逾涯但臣父年高旁無兼侍昨受秦州之命亦嘗緣此自陳事播朝班言存聖聽況今益州除授寵利兩優雖國家任人自有大體而縉紳所指實貽清議敢望大明委照洪慈亭育垂憐拙守加憫孤蹤許臣以見官留滿今任犬馬之力期後効於驅馳烏鳥微情庶獲

伸於哺養望闕待命不任隕越

上殿再免知益州劄子

臣近被勅命差知益州奉表及劄子以親老乞且終滿滑州見任准中書劄子奉聖旨不許辭免又聞已差梅摯知滑州亦有朝旨不許辭讓梅摯緣輔郡加職已朝謝臣於事體難為更留本郡今奉恩旨朝覲獲對天顏敢再瀝懇誠上黷宸聽伏以益州方面甚重朝廷寄任非輕臣以庸虛誤膺推擇便當策勵駑鈍往虔詔條但

以臣父年俯傳家而臣終鮮兄弟賤息尚幼未堪承事  
義難違遠苟冒寵靈敢望聖慈垂矜愚守俾循陔之志  
獲展於盛朝則圖報之心誓伸於異日臣無任激切待  
命之至

益州謝上表

蜀控西面益為大藩臨守之難畀付為重茲既署事實  
深惴懷中謝伏念臣資地本寒機悟殊淺偶緣朴學進  
會休辰久塵侍從之塗荐更華要之地曾微云補之効

第忘內疚之憂一昨起奉慈宸出分褰服烏鳥之情甚  
樂犬羊之孽自宜適偶清衷深圖遠御庸殿一都之會  
專鈴兩道之兵枯朽見雕款段仍駕復冒寵陞之命無  
容固讓之私錦里舊城陸海千里軍屯整睦民俗阜康  
訟事不煩遨嬉多暇此蓋尊號皇帝陛下內全哲惠旁  
達聰明謂常預於樞機知頗存於謹厚可行寬詔以撫  
遐方謹當精究事為修明紀律冀成安輯之效持荅聖  
神之休愧覲瞻天跼蹐無地

益州謝詔書獎諭表

進奏院逋到勅書一道以益州路轉運使奏據本州吏民乞留臣滿三年伏蒙聖恩特降獎諭者錫命自天悅日星之下燭跼身無地慄淵谷以內驚惟功善之不聞冒寵靈之誤及省循無狀愧慄兼懷中謝臣聞漢宣帝之勵精留思良吏唐明皇之求治注意外官然如膠東潁川治有異等之効濟陽河內事昭將順之誠方被璽書之褒而蒙絲言之飾前朝盛事舊史美談如臣者所

蘊虛疎見拔孤遠早玷清華之選久陪英俊之游頃自  
禁嚴外分藩翰維益部一都之會據坤隅千里之疆氣  
俗剽輕貨利繁錯比守臣之彈治習舊事之便宜居然  
方面之雄稱為權寄之重獨顧行能之下亦叨推擇之  
行然頗知獄市者為政所先賦役者治人之本戒諸苛  
擾務在平均良用拙勤粗免隳斃不意吏民舉浮淺之  
迹朝廷敦獎勸之方細札十行置郵百舍善聲不著方  
虞責問之來榮號所加適取虛名之誚此蓋尊號皇帝

陛下凝神象表垂統化元盛節隆乎中和美利充乎高  
厚君視臣如心膂允謂至仁天自民之聰明故無遺聽  
百城聳觀遐俗知榮臣敢不上體宸慈下修官業率勵  
愚柔之性無怠百千荅揚覆照之恩少裨萬一

謝除三司使表

伏蒙聖恩授臣依前尚書戶部侍郎充三司使者驛遽  
奔塗虔趨於嚴召芝函錫命進冒於寵光俾專筭計之  
煩實玷難才之選勢名參重醜汗交盈中謝伏念臣樸



鄙孤生孱疎近器夙選堯文之郁荐膺漢詔之求縹組  
朝闡濫中儒館職箴規於獸省記言動於螭塗蒙擢掖  
垣遂登禁署中司執憲會府理財蹉跌外除因循十稔  
比自日畿之近徙臨蜀表之遐勉布寬條汜寧遠俗績  
幽宜紂履廣惟私亟蒙瑞節之華歸奉燕朝之覲不謂  
尚存睿眷前出制音繇左戶之班聯商大農之功利夫  
以會計之重賦入有經惟貨盈虛繫時休戚方今邊警  
雖徹而列屯猶厚年穀鮮登而沈冗為多調度既繁儲

用幾蹙豈宜懦品竊假要權此蓋尊號皇帝陛下乾健  
垂明宸慈廣愛誤以愚朴目為幹臣謂歲代之最深久  
更已試察羈蹤之自立素不因人優以職儀俾之器使  
敢不力求姦弊顓講富彊事有可為固自宜於竭盡衆  
之所避亦無憚於設施誓堅忠蓋之忱上荅簡求之造  
乞免三司使不允謝荅詔表

伏蒙聖慈以臣近上劄子乞解職出知鄆州特賜詔書  
不允者備員主計歲涉再期辭劇請藩章凡六上荷淵

衷之憐惻紆璽札之丁寧仍示撫存未容罷免內循孤

拙愈極兢危

中謝

臣慶厯中擢自憲臺長茲會府于時

齒髮方壯精力尚彊雖趣辦應猝之非長獨居官任職而無廢早以目疾求解利權久方開俞得還禁近自爾出入中外奔走川塗更歷數州又逾一紀嚮罷坤維之守志圖近郡而行遽被詔除復膺使任臣聞命之始即以舊疾為言就職而來每以曠務為慮蓋財用之均節繫剖析之謹嚴急之則害於農商緩之或容於姦利責

其簿領之効實存省察之明而臣心之精微比頃年而亦耗目之瞭眊迤近歲而有加或苦勞瘁乃移告謁因控懇誠之切屢形封奏之詳願停三使之浩繁竊丐一麾而休息公議幸寬於譴効朝恩亦盡於優容實陳力之不任非無名而罷去豈謂尊號皇帝陛下俯矜愚守早綴近班不違道以求全頗著誠而無偽再頒溫詔曲諭訓言重念臣所苦未平知分頗熟儻精神之可強顧煩冗以何辭但懼眩昏致墮重害雖虛懷容納俾收累

久之勤而列牘干祈未免再三之瀆至明垂鑒丹悃寧  
誣

謝兼翰林侍讀學士表

伏奉制書以臣差知秦州授臣兼翰林侍讀學士者塞  
垣謀帥議及孱材講席敷經恩加異數仰膺睿獎交悖  
危悰中謝臣本起寒生親逢盛旦兩迓軒陞之問連策  
草茅之愚空竊虛名曷裨要務遘黜纓於諫署即珥筆  
於史林仙掖代言禁坡眎草領中司而持憲專大計以

治財皆憑誤知茂樹成績嚮從州寄頻換歲筭復遘母  
憂退棲閤閑近奉明庭之對重趨法從之班雖荷德音  
屢矜滯迹自循拙守方避英游閒局冷司無關於朋比  
陳編蠹簡更續於見聞豈謂邊將終更聖宸擇守俾自  
承明之直往提戎已之屯陞持橐於書筵命擁旄於藩  
閫載言會幸奚塞疇咨此蓋伏遇尊號皇帝陛下濬發  
皇明旁求介善不責全於士類嘗圖舊於臣隣曲記小  
忠曩經煩使因推光寵以峻事權況臣陪殿幄之凝嚴

典閣圖之與祕如評榮進已處美階令兼講勸之員愈  
重論思之職暨引章而懇避承垂詔以敦臨帝意難辭  
人言可畏為儒薄分於叨冒以固多報國私誠在効酬  
而都淺惟益虔於夙夕庶少荅於涓埃

南京謝上表

伏奉制命除臣端明殿學士兼龍圖閣學士守尚書左  
丞知應天府兼南京留守司已於今月十日到任上訖  
陪京分守實王業之所基故社言歸在仕游之為寵肅

膺期命已布守條

中謝

伏念以植性冥頑逢時熙盛荷

聖神之眷察繇文史以誤知漫歷歲華洊承官乏詞垣  
禁署間黷詳延憲府計籌嘗塵器使斥麾去國就日來  
朝洎蒙右蜀之遷復有大農之召司均九式顧調度以  
靡充營職一心亦勩勤而敢怠叙升省轄出領留都仍  
還籍於禁嚴示推慈之渥洽此蓋尊號皇帝陛下幽而  
必燭覆以無私隱其有不移之愚俾之以自求之福典  
茲宮鑰之重綽然里閑之華顧莫稱於恩光徒有慙於



委寄撫心自省當益勵於乃修有軀可捐尚更圖於所  
報

辭免知秦州奏狀

今月十九日進奏院遞到勅告一道除臣工部尚書秦  
鳳路兵馬都部署經畧安撫使兼知秦州者秦州重鎮  
尚書重官伏蒙聖恩俯及孤外在臣虛薄豈堪眷委兼  
臣父年老久患脚膝不任騎乘關隴山阻實難迎侍遠  
行敢望天慈矜察情懇特賜追寢新命許令終滿今任

非但便臣庭闈之養抑免誤國方面之寄所降勅告未  
敢祇受

謝賜手詔第一表

今月初八日進奏院遞到賜臣詔勅一道以臣奏陳為  
父老乞免秦州滿今任不許辭免便令受告勅發赴本  
任者錫命自天烜日星之下燭躅身無地慄淵谷以內  
驚進退徊徨啟居震恐中謝伏念臣性資疎拙自奮單  
微實乏出倫之才誤蒙不次之舉寅緣資歷躋躡顯榮

向解計圖叨司留鑰榮歸故里養展私庭曾微治效之  
聞敢冀光靈之及伏蒙尊號皇帝陛下俯矜愚守久綴  
近班進文昌八座之聯委西州一面之寄惟是行能之  
下忝茲推擇之行天地生成曾未侔於全度形骸捐廢  
固莫報於深仁曷敢逡巡妄為激潔但以臣父筋力已  
謝齒髮寢衰孝德訓人不責便親之請愧心即路是專  
冒寵之懷被細札之丁寧增懦衷之隕穫粗致其樂願  
伸一二之私深察其情儻宥再三之贖

辭免第二狀

右臣昨蒙聖恩除工部尚書知秦州以父老患脚膝難以迎侍遠行尋具奏陳乞滿今任今月八日伏奉詔勅不許辭免便令受告勅疾速發付本任者臣已具表稱謝外敢傾私懇再躡天威伏以寵命遷除邊方委寄猥加虛薄實冒恩榮前所陳情非緣矯激臣父年逾七十脚膝早衰跋履遠行艱於騎乘臣去年外補上荷天慈陪都鄉里方安奉養今塞徼清謐鄰敵輯和中外峻良

足備推擇敢祈宸造俯遂微衷特寢新除許仍舊任荐  
煩睿聽敢逃罪責

謝賜手詔第二表

今月二十六日進奏院遞到賜臣詔書一道不許辭免  
秦州令依前命疾速赴任者天聽蓋高念微誠之難徹  
威光孔通感慈旨之下頒有愧拜嘉尚祈得請中謝伏  
念臣材資至下地望尤寒幸遘熙辰久塵清貫出當方  
面曾風迹以無聞入總計圖顧事功之不立頃分留鑰

獲養私庭未易歲筭遽遷邊閫中臺喉舌之重西藩斧  
戟之雄朝寄非輕寵光甚渥在王臣之義況無難而可  
辭但人子之心幸奉親之為便爰罄由衷之請願終奉  
計之期荐叩公車再窺方面垂矜危惻未寘嚴誅此蓋  
尊號皇帝陛下舜孝格天堯仁被世君使臣以禮允昭  
德教之隆臣承命為恭甘俟典刑之及竊惟覆照俯逮  
幽微遂愚志於一夫致懼心於萬國

辭免第三狀

右臣昨蒙聖恩除工部尚書知秦州以父老患脚膝難以迎侍遠行再具奏陳乞滿今任今月二十六日復奉詔勅不許辭免令依前命疾速赴任臣已具表稱謝外竊惟愚誠有所未盡上煩聰聰遂至再三干黷天威分當嚴憲朝廷不以臣才下付之方面加寵而行齒髮尚壯稍任劇使奚事顧憚妄為避免但以父年高末弱不堪乘騎須至遠冒炎暑輦而就道風氣有隙或以愆和由臣貪冒恩榮虧玷風教聖仁孝治及人之老區區危

惘敢祈矜亮今月二十五日趙槃已到本府交割公事  
管勾徐濟州並係京東去南京不遠迎侍便近伏望聖  
慈就移一郡少安孤拙臣見在本府祇聽朝旨君命至  
重詔勅再降臣不即祇受自速典刑不任戰越待罪之  
至

謝賜手詔第三表

今月十五日進奏院遞到詔勅一道賜臣令依前降指  
揮發赴秦州本任者需章滯懇屢干疏宸之嚴溫詔遣



行荐被絲綸之寵拜嘉優重積慮兢惶

中謝

伏念臣向

奉制函亟更蕃祭文昌八座進陟卿聯隴坻一隅俾專

閫制退惟親便屢以誠陳願回渙汗之恩少適循陔之

養愚衷所冀宸鑒未俞稽留一尺之書合從吏訊繼奉

十行之札仍促駕行祇覲褒章實增厚愧此蓋尊號皇

帝陛下照臨施普覆載均休遠微一物之遺慎擇四方

之守眷存孤舊預在選掄示以大方采其微效仰聆睿

訓俯極覲顧顧惟三瀆之煩實有再思之懼敢不恪趨

官守躬布詔條揭節戒徒指西州而即路瞻雲結應望  
北闕以馳誠

上殿辭免劄子

臣近自應天府就移知秦州以父年老患脚膝難以迎  
侍遠行乞賜停寢詔旨不俞天聽蓋高君命至重不敢  
煩黷祇受告勅今蒙恩朝見獲面天顏敢瀝危衷猶希  
矜亮秦州於邊鎮尤為雄劇朝廷擇守委任非輕況今  
疆索晏清顧臣齒髮猶壯猥承寵寄何事懇辭但義有

未安誠當開列臣皇祐五年曾差知此州是時已為迎  
侍不便嘗所控陳昨罷三司知應天府亦緣便親得請  
今陛下方以仁孝治天下臣子於奉養之私莫不得所  
願臣若貪冒恩榮事親不盡奚待典刑之及故於名教  
有虧仰冀天慈曲全拙守特與鄉便一郡徐毫濟州皆  
於南京為近烏鳥之情儻得伸於茲日犬馬之力尚當  
効於他年干黷宸嚴分甘誅竄

秦州謝上表

昨奉勅命差充秦鳳路馬步軍都部署經略安撫使兼  
知秦州軍州已於今月二十七日到任署上訖者一都  
之會控制西陲兩使之符謬膺中選爰此布條之始實  
深思職之憂中謝伏念臣起自孤平表惟疎拙入朝荷  
橐蚤次於禁塗出守腰章屢當於方面任隆有責効薄  
未酬曩辭邦計之煩獲假留都之近迹依鄉國情展親  
闡方幸便安俄叨簡擢進除省座往殿冀門護岐隴之  
師屯撫洮河之種落雖連收之寄尤重顧晨昏之養難

違因上達於懇誠屢煩紆於詔督曲形公議莫徇私懷  
驅暢轂以戒塗敢稽嚴旨奉安輿而至部幸慰慈顏此  
蓋尊號皇帝陛下愛物無私使人以舊恢天下之度何  
遠而不柔付閭外之權惟才而是用良慙菲陋曷稱旁  
求幸今邊警之晏然上體聖謨之共此敢不殫竭精慮  
詳求遠圖期刑政之得中副乾坤之平施內面丹闕乃  
心一誠

乞罷禁林就閒曹劄子

臣祇奉聖恩召還詞禁臣久患眼疾僅二十年舊學廢忘無以備顧問素業荒疎無以應時用若復典司制命自揆不堪供職又臣父年八十有二近在徐州卧疾半年至今右手乏力臂指不相為用今當更直省內家無兼侍之人早昏緩急敢安愚慮臣受命之日即欲自言孤遠之情難期察允故待到闕幸對天顏上謝宸慈採擢之賜俯陳微衷深切之懇所祈覆育曲賜矜容俾就閒曹獲全拙守候近郡有闕乞別就一差遣奉法循理

少分憂寄臣不任荷恩待罪激切之至

免起復除參知政事第一表

今月某日試祕書省校書郎充睦親廣親北宅小學教授蔡天申齋到詔書一道授臣起復前官赴闕者三年之制天下之達喪終身之憂人倫之大義承恩命之至重在情理而匪安中謝伏念臣早冒寵榮久尸祿養無事功之可紀積咎釁以為多蒙聖神之誤知假名器而虛授上辜天造莫効於涓埃不意慈親遽罹於禍酷懷

茲鉅痛豈莫餘生使傳忽臨朝恩特降舉權宜之故事  
爰追召以還朝聞命哀迷撫心悸慄矧惟銜恤甫此逾  
時孑然一身未復同生之戚敢有二事居然從利之為  
伏望皇帝陛下隱惻上仁恫矜微志絀奪情之弊典惟  
致孝之永懷特寢天恩用敦本俗許畢倚廬之慕免累  
聖朝之明螻蟻之微儻獲終其所願犬馬之力期得盡  
於他時臣不勝號殞俟命激切之至其詔書不敢捧承  
謹令某人齋赴闕於通進司投納兼奉表陳乞以聞



詔

勅某省所上表乞免起復恩命事具悉朕方履天下之  
籍疇咨大臣以供天職以卿雋老茂德久鬱而未奮斷  
自朕志擢佐鼎軸將觀夫深謀秘議倏然起廟堂而澤  
四海未及踰月遽罹艱棘釋位而去已畢哭踊之期宜  
從墨衰還復舊府深謀秘議遂而卒其功烈此朕所以  
拱袂以遲卿之來耳所乞宜不允故茲詔示想宜知悉  
春寒卿比平安好遣書指不多及

## 第二表

今月某日某官再齋賜詔書一道授臣起復前官者哀誠激切未諒於清衷詔札丁寧復申於明命憂惶失措悲哽莫勝重瀝懇情冀垂察允

中謝

臣聞聖人制禮愚

者企而及之君子篤親天下從而化矣顧鴈生之無狀茂介善以自名昔自弱微實勤力養終鮮兄弟素無田廬徒用丐遊以給晨昏之事暨叨宦達遂蒙根葉之榮自念孤單每懷喜懼數陳情而聞請求解職以便私頃

復禁嚴寢違志願先臣雖年耄老氣本清和小真起居  
之常未切憂危之慮昨承宣對垂諭選除仰奉德音已  
陳深懇逮明廷之贊授面法座以控辭聰聰不回天心  
具照誠荷及親之幸遽罹過隙之悲退守几筵甫更時  
序豈期宸眷猥降璽封承命不惶悼心自失上稽嚴旨  
敢盡苦辭伏念皇帝陛下大義愛人深恩恕物俾終祥  
禪以報勛勞則所守粗完免作亂常之首餘生未謝永  
酬錫類之仁隕涕椎心期於得請臣無任號訴激切之

至其詔書不敢捧承謹因蔡天申齋還赴闕於通進司  
投納兼奉表陳乞以聞

詔

勅某省所再上表今月五日蔡天申齋到詔書授臣起  
復前官伏望俾終祥禪以報劬勞其詔書不敢捧承謹  
因蔡天申齋還赴闕事具悉三年之喪雖天下之所通  
惟國家急賢則經制可以權奪而臣子順變故至恩亦  
以義斷卿嚮參柄用旋屬家艱既虛席以踰時宜抑情

而復位已嘗啟諭當體至懷所乞宜不允故茲詔示想  
宜知悉春暄御比平安好遣書指不多及

第三表

今月二日某官再齋賜詔書一道授臣起復前官者朝  
命至嚴已辱再三之重私情所切期伸萬一之微哀迫  
靡遑矜從是幸中謝臣聞孔子曰人鮮有能自致者其  
惟父母之喪乎故三年之制天下之達禮尊卑所同古  
今不變用紀人倫之厚茲為王化之本在國朝之制繇

慶厯以還近自親賢外通文武悉優容於在疚申鉅創  
以盡情豈獨孤臣敢忘大義方聖神之獨化會傑俊以  
熙朝羣材並施自成乎大厦一毛雖落誰謂乎無牛曾  
是庸虛奚為損益惟踐修之常守乃補道之近規雖出  
下中猶知企及敢作亂倫之首以傷則哲之明輒冒罪  
誅訖陳情懇伏望皇帝陛下天無私覆物有曲成溥推  
亭育之仁俯軫蓋高之聽上全王體下盡私恩儻前畢  
於祥除或幸存於視息則區區薄志獲伸永慕之懷穆

穆清光猶有再瞻之望興言哽塞實切憂惶臣無任號  
訴屏營之至其詔書不敢捧當謹因某人齋赴闕進納  
兼奉表陳乞以聞


隨第三表劄子

臣頃因進對仰奉德音以為君人之道當正紀律審命  
令茲謂持重之要蓋禮煩則黷恩過則輕節以制度馭  
下之操術也祖宗朝臣僚表章之儀朝廷詔荅之體公  
式所著舊典具存近歲以來頗逾故事或因勞舊特加

異數後來何者遂沿為例既無甄別徒紊憲綱至如兩  
府起復仁宗朝富弼以宰臣當國釋位服喪五降詔書  
竟許終制即是起復之命決不可復行至于吳奎召旨  
尤峻奎歷陳將相執喪近事亦蒙報允臣昨膺擢用曾  
未旬浹莫展絲毫之効遽罹荼毒之苦甫經時序三辱  
璽封銜哀抱愧容身靡所在臣之分恩典已過過此以  
往恐非所謂正紀律審命令之深旨也臣已上表披瀝  
情懇伏望陛下天日光明委照萬物察臣薄守非有詭



激寢罷後命以明等威早圖俊賢裨贊國論積精會神  
共熙庶績上以尊乎王體下以全於拙艱苦由餘息不  
勝願望謹具劄子以聞



樂全集卷二十八

欽定四庫全書

集部

樂全集卷二十九

詳校官庶吉士臣龍廷槐

檢討臣何思鈞覆勘

總校官中書臣朱 鈐

校對官中書臣吳 俊

謄錄監生臣鰲 圖

欽定四庫全書

樂全集卷三十九

宋 張方平 撰

表狀

許終喪制詔

勅某有所三上表并劄子乞免起復恩命事具悉朕之  
疇咨四維之輔首用擢卿以陪幹王室未及庭謝以鉅  
創釋位而去俾朕歉然思欲以墨綬起卿於苴麻之次  
累辭痛切諭之而彌固記有之君子不奪喪朕奚敢違

禮必欲奪人之憂乎夫喪致乎哀而止無所過毀以傷性也廟堂之論猶將待卿以參擇焉依所乞許終喪制故茲詔示想宜知悉春暄卿比平安好遣書指不多及

謝許終喪表

今月十五日進奏院遞到詔書一道伏蒙聖恩以臣上表辭免起復特許終喪者哀懇怔忡數塵於睿覽俞音軫惻許畢於喪期追成命之已行遂私恩之罔極微誠既達餘息再生中謝伏念臣起自單微久塵通顯國之厚

祿早仲反哺之懷朝有榮階實荷流根之澤仰繫仁治  
獲報義方向繇疎薄之材上被聖神之選捧承綸命及  
見庭闈雖迫隙光備蒙贈典惟是稱情之制斯為致孝  
之終方伏堊廬遽聞詔檢輒稽留於嚴旨屢披瀝於血  
誠孰云在陰之微亦有聞天之感俯回英聽垂亮孤衷  
許循致治之常以盡免懷之慕丁寧細札徇人欲以矜  
從荒疚餘生戴天恩而殞絕此蓋皇帝陛下遠存古道  
下厚時風本盛德以興仁擴寶慈之惻隱章明大義沛

發溫俞謂墨經之非經著素冠之得禮賜周存沒施厚  
生成草芥寸心亦抱太陽之焰潢汙一勺期歸滄海之  
深畢命王家敢有遺力

免俸劄子

臣今月二十一日得應天府送到中書劄子一道奉聖  
旨特令依見任參知政事請俸減半支給者臣聞以庸  
制祿自古為國之大經也設官分職量其功勤而賦之  
祿未有安坐而享之者臣執喪在廬無所事事承此恩

旨義何可當況近時將相重位居喪而蒙恩給俸者辭免皆得請臣今所授中書劄子不敢捧承已封繳納中書

## 第二劄子

臣今月五日得應天府送到中書劄子一道以臣昨奉聖恩特令依見任參知政事請俸減半支給具劄子辭免奉聖旨所乞不允者切以先王立制為邦大經位所以待才祿所以報功國之操柄於是乎在若其憂服之

中已致官職之事而乃叨冒重恩蒙享厚祿內於情而不稱外於義而有傷雖甚鄙庸敢辱名教伏望天慈許循近例特從停寢少安愧懼

免知陳州降詔不允謝表

今月一日進奏院遞到詔書一道以臣免知陳州不允者攝職間司分從於病廢領麾便郡復被於詔除中謝伏念臣立節無奇文少近野為學荒略曾弗究於一家賦性闊疎顧靡堪於諸闕荐更臺閣之要久依戶牖之嚴



上荷清衷俯知素守有愧珪璋之特迺蒙藻黻之華海  
鳥暫馴虛設太牢之饗風簫忽過豈諧雅奏之和尋外  
補於輔藩遂引歸於舊里冀安末節遂以窮年且隣解  
紱之期忽被遺簪之訪此蓋皇帝陛下乾坤均施曜魄  
並明謂嘗奉於清寧知頗由於忠厚綸音存錄璽札敦  
行君命臣承敢忘於祇率政平訟理但愧於循良向日  
傾心望雲馳戀

陳州謝上表

奉勅差知陳州軍州事已於今月二十二日到任上訖  
太皞之虛蓋自上皇之世有媯之後爰聞盛德之封氣  
俗敦淳土宜博厚日畿神甸先承首善之流者望宿勲  
茲迺均勞之地中謝伏念臣久叨近列無所取材向出守

於是邦實祇聞於面命俄嬰病恙遂解麾符司憲陪都  
粗安於拙分于蕃近輔愧荷於明恩此蓋皇帝陛下圓  
覆無私大明委照有守者則錫之福可器者必盡其工  
顧惟孤陋之微亦荷記存之及敢不上膺簡亮自力裒

疲更礪鋒刀聊施於一割所憂駕乘難効於長驅進退  
怔忡罔知攸措

辭免宣徽使劄子

熙寧七年  
十二月

臣伏蒙聖恩除宣徽北院使檢校太保判應天府宣徽  
近司地聯二府名器之重禮秩至崇臣才望非高器識  
殊陋恭聞明命不任戰越朝廷舊制自前任二府臣僚  
改宣徽使皆由寄任除授故於物議為允臣職叨祕殿  
位列六官祇膺渥典雖有前例但以昨由輔郡移守陪

都本為便私又居近地異寄任之重非宣力之處虛冒  
榮祿誠為僥倖况臣昨求朝覲獲至京闕止望一登文  
陛仰對清光以上謝於眷懷敢切希於晉寵天明下燭  
宸造曲成特降綸言俾叅近綴在臣自量豈遑安處敢  
陳丹懇冒黷淵聰伏冀聖明俯垂察諒特回制命以全  
愚守

辭免宣徽使欲乞近京一郡劄子

臣伏蒙聖恩久奉朝請今幸遇同天節稱慶禮畢敢瀝

懇誠上千天聽切以宣徽近司地重而無責非國重戚  
而以恩澤加優者未嘗徒處也臣向因移任過京覲對  
猥承寵命遂留供職素餐充位豈所遑寧欲乞近京一  
郡稍便鄉閭粗安素守伏望聖慈特垂察允

辭免中太一宮使劄子

臣承閭門告報已降勅命差充中太一宮使臣近以奉  
朝請備位而無所事故乞一郡以安愚分伏蒙聖慈更  
加重職愧尸素而有請被恩典而愈優虛冒寵光無施

報稱切自省循豈遑寧處所降勅命不敢祇受伏望據前所陳乞特賜施行

謝除中太一宮使表

伏奉勅命差充中太一宮使已赴本宮管勾訖十精天之貴神肇開靖館五鎮國之命祀舊啓靈祠崇奉式嚴典司為重謬充使職上出宸恩中謝伏念臣仕適逢時材非濟務智用同乎綆短不可以汲深切實譬之拔揚無得而成大昨領別都之鑰許觀中天之廷祇荷明恩俾

陞近綴既久陪於朝著輒干請於郡章復膺溫檢之榮  
兼領殊庭之重披誠封奏申錫詔音嘉命是承危悰增  
惕此蓋皇帝陛下惠深涵養仁浹施生猥加體貌之隆  
奚取典刑之舊衰癯之質極蒲柳之望秋云補之心猶  
螢燭之嚮日念言謝事近在踰年敢希止足之風庶免  
婆娑之事實惟素志敢昧大明

免中太一宮使乞外任劄子

臣竊惟人臣立朝出處固有常分苟失其節必貽悔咎

人君之所以厚遇其下非但優之以祿位而已亦在察其志之所存使處得其所斯可以為厚矣臣早際聖明特蒙察舉採諸羣議之外擢於執政之末罷而外補優以閒曹甫及二年復除便郡每垂記錄皆出淵衷昨自陳州就移應天府自念衰晚前迫引年若便道以之官望清光而無日故因過闕請來朝見止一謝以眷懷敢切希於寵利本期旬浹即望辭行陛下特軫慈衷俯矜舊物發於中旨處之近司曲示敦留俾奉朝請日趨嚴



陛俄僅半年昨逢誕慶之辰已畢奉觴之禮故求一郡  
冀安素守今蒙聖恩更加宮使名秩增重優幸尤多今  
陛下厲精庶政自朝至於日中昃不遑暇食中外事無  
大小靡不經於神慮觀游娛宴未嘗留情輔臣百司莫  
不夙夜豈容浮冗獨無所事于其間以一介孤遠之蹤  
席貴戚恩澤之地取譏清議上累公朝是敢虔瀝懇誠  
仰塵聰聽欲祈近南京一郡退養衰疲則是宸造曲成  
慈眷尤厚始終保全實繫洪覆冒瀆天威仰祈察允

辭免判永興軍劄子

臣自忝近司奉朝供職日趨嚴陞俄僅半年昨逢誕慶之辰已畢奉觴之禮故求補外退安素守數傾情懇未奉俞音今承差知永興軍須至復有干黷伏以永興大藩寄委為重但臣行將七十筋力殫疲目昏耳鳴精神內竭比及謝事纔餘半年今去鄉閭程途頗遠虛煩吏民迎新送故伏冀聖慈檢會臣前奏乞改京東一郡顧茲衰暮得近松楸致仕之日歸田為便敢冀慈衷垂憫

宸造曲成保全之恩終始大幸上冒天威仰祈察允

陳乞外任劄子

臣早遇聖明特承眷獎昨因朝覲處之近職仰依洪覆  
實為優幸然臣年齒遲暮志氣衰索資本疎拙無所取  
材處則莫施補報之勤出則不堪煩重之寄而一介之  
守粗安常分上不敢為詭潔之操下不敢為貪冒之行  
故求徐究一郡所冀漸就田廬荐瀝懇誠未蒙察允伏  
望天慈俯矜愚朴特推保息之仁獲遂首丘之願干黷

聰聰臣無任哀祈激切之至

再陳乞外任劄子

臣陳乞外任方在私第俟命伏蒙聖恩宣召今奉朝供職臣不避嚴誅須至再陳誠懇念臣齒髮遲暮志氣衰索累求一郡退安拙守干黷天聽未蒙委照雖進退之禮慈衷曲示於眷懷而出處之方愚臣宜有以自處伏望聖明俯加矜察特允前乞以畢私幸臣無任祈天俟命戰越激切之至

乞致仕第一表

臣聞事君主於無隱誠必自通陳力至於不能勢宜知

止輒露引年之懇仰干從欲之仁

中謝

伏念臣親際盛明

早塵華顯文章不足以潤色才業有愧於經綸歷事三

朝殆通四紀內之清塗嚴闥極侍從之榮外之名城大

都徧藩守之選乏嘉猷以告於后無膏澤以下於民徒

以朴忠愚直之心資不能改至於利害得失之際初不

自謀緣茲過被於聖知嘗亦與聞於國論士儒至此幸

遇已多比奉對於清問每自陳於衷拙莫保留宮之鑰坐  
安喬木之邦惟饗顧良時忽焉而如失年齡浸邁疾疹  
交乘神明潰虛難支於外慮筋骸摧荅頓異於前時榮  
敢尚貪福知已過非獨招滿盈之禍懼將累覆燾之恩  
迫此憂危期於引謝伏望皇帝陛下曲矜舊物深燭至  
誠貸其無補於涓塵哀此已疲之犬馬許上還於冠紱  
俾退養於丘園順服生經儻保完於餘喘願陪鄉老永  
歌誦於太平上以成君父始終之仁下以全臣子進退

之節伏乞聖慈特許臣致仕

詔

勅某省所上表陳乞致仕事具悉中外老成朝廷倚而為重始終厚遇人臣去不可輕卿寵光進躡於疑丞禮貌兼隆於德齒比擇留都之優近仍從故里之便安胡亟上於封章顧請還於印紱徒事括沖之舉殊違眷異之懷所乞宜不允故茲詔示想宜知悉秋冷卿比平安好遣書指不多及

第二表

近者輒具奏封乞從致仕伏承溫詔未賜俞音懼汗莫

勝危誠難止

中謝

伏念臣材資極陋身世至孤幸緣明主

之知簡拔衆人之上功勤何有祿位過盈雖存王室之心死然後已而徇公家之事耄矣無能尚被優容復叨居守厲衰殘而矍鑠不免曠官懷寵遇而留連又將滿歲災釁時作罷癘日增念治世之難遭抑重恩之未報迫茲頽朽無以勉彊況今時不乏人人得其所自惟進



退何繫重輕捧細札之丁寧益孤衷之感涕朝經所著  
惟禮分之有常天聽蓋高冀精神之可徹伏惟皇帝陛  
下天無私覆物遂其生俯推保息之慈特軫矜從之造  
幸全拙守俾佚餘年既以免鐘鳴不止之譏又以脫器  
滿則傾之禍咏陶樂聖恬莫終身雖在林丘之微不忘  
君父之賜

詔

勅某省所再上表陳乞致仕事具悉卿歷事三朝嘗更

二府頃授宣猷之秩往司居守之權方委才明坐分憂  
寄忽屢陳於封奏祈上致於官榮曰老而傳雖耆年之  
常制若不得謝亦禮典之舊章宜體悉於眷懷勿堅求  
於沖退所乞宜不允故茲詔示想宜知悉冬寒卿比平  
安好遣書指不多及

第三表

伏奉詔勅以臣近上第二表陳乞致仕所請不允者恩  
由特旨禮過舊章恭被訓詞倍深感愧在念舊之仁既

厚顧籲天之願未從敢瀝肺腑再干黻纁中謝伏念臣蚤

緣一介獲事三朝濫沐恩榮祇緣幸遇積歲時而徒久

曾報稱之蔑聞比陪近綴之嚴每慮素餐之誚間因燕

見屢嘗懇激於引年度奉德音乃復逡巡而就次出司

留鑰入浹歲筭桑榆之光徒引高年之望犬馬之力豈

堪長路之馳雖復勉強良難振起故傾丹悃以乞殘骸

敢謂聖度寬大而曲容拙疎天眷惻怛而尚加撫遇切

念事君之禮雖以承命而為恭然其陳力有期至於不

能而則止冀念微守仰答深仁謹復盡辭庶希得謝伏  
望皇帝陛下廓日月之照而幽無不燭推天地之造而  
物皆遂生許上麾符俾安田里黃髮兒齒退從鄉社之  
游文陛赤墀徒望天衢之遠逶迤末路誦咏昌辰茲惟  
君父之慈豈特丘山之重

詔

勅某省所三上表陳乞致仕事具悉卿位居法從歷年  
滋多職踐政途宣力尤至比從近列出領別都方資鎮

靜之才坐委居留之任奚屢陳於封奏祈自解於事權  
朕注懷老成優眷舊德宜體待賢之禮少捐知止之懷  
勉安爾官無拂予命所乞宜不允故茲詔示想宜知悉  
冬寒卿比平安好遣書指不多及

乞致仕劄子

臣昨者上章陳乞致仕伏蒙聖恩降賜詔書不允固合  
上稟德音姑安分守然義不獲已理難苟安臣自念荒  
踈久塵近列犬馬之年七十有一本期過同天節方仲

前請涉春以來舊所患眼疾頻發昏痛至於簽押案牘披覽詞訟每委僚佐一面發遣事屬妨闕切不自遑而又心氣虛煩動多遺忘深惟此疾非旦夕可愈雖欲勉強難以遷延仰祈天慈俯垂矜念前未得謝已為恩禮之隆今復自陳可諒懇誠之至伏乞朝廷檢會前後奏請特許致仕上荷大君之德下從鄉老之游樂聖安時以全素履

乞致仕第二劄子

臣近奏乞致仕准中書劄子奉聖旨所乞不允臣資養  
愚然切嘗聞事君之道矣蓋君猶天也天可欺歟人之  
悖德敢於欺天而後忍於欺君也臣雖不令不敢以忠  
信自期然一介之守亦粗有所存矣當有聞於天聰敢  
不以誠者哉臣自熙寧三年赴任陳州於路得疾面目  
偏急後醫治雖痊損然終不復舊至今語謇澁心多悖  
易忘時昏眩故向者在朝因對屢常面求謝退夫隆名  
重祿是人之所欲臣非事詭激獨異於人蓋自度不任

恐無益於國以上累於聖知此實深情所在自到南京  
又一年半精力寢衰惟自知覺加之目痛心氣虛煩其  
於公事實多妨闕以臣素好道養故外若可觀然實無  
功效譬之土木偶其中朽矣故事曾處近司而乞致仕  
者章再上而得請臣已四請而不允天恩可謂隆厚矣  
今者不避誅殛復上干於宸扆言出肝鬲非有飾辭游  
說大明在上無幽不燭覆育之下生物咸遂况臣孤拙  
夙被慈眷今茲微懇可無感徹伏乞特開恩旨許令致



仕仰冀曲成之賜俾蒙保息之仁荷天之休以終暮齒  
辭免東太一宮使劄子

臣伏奉勅命就差充東太一宮使許以南京居住者臣  
昨乞致仕累黷天威今蒙聖恩更授宮使列在近班處  
之真館上承渥眷以感以懼然於愚衷有不安者又須  
再披誠懇仰冒宸聰臣猶自以為煩然於義不獲已切  
惟陛下勵精庶政惟日孜孜臨聽至於中昃程書逮乎  
乙夜弼臣近司陟降勤恪百工羣吏各有官責臣在朝

無補於國何勞自以年齒衰暮氣力疲乏故乞殘體以  
避能者天高聽卑得請為幸今乃以重職而家居享厚  
祿而閒佚臣竊安此物議謂何伏望陛下正王制名實  
之體成臣子進退之宜特許致仕是臣本志儻過辱優  
禮未容謝退乞特還舊秩領一閒曹雖媿備員之冗庶  
寬浮食之慙上足以昭示恩慈下可以少安分守仰依  
天日得引歲華覆照之下實獲容處

謝東太一宮使表

昨者陳乞致仕伏承勅命就差充東太一宮使許於南  
京居住尋再伸前懇或乞還舊官今奉詔書不允者欲  
致為臣蓋衰齡之所迫恩不得謝尚舊物之未遺止解  
鑰於留宮猶備員於真館忝冒滋甚兢悸靡遑中謝伏念  
臣本自寒生曾微遠用雖薄聞於大道亦粗守於孤忠  
其實蠢愚誤被三朝之所獎至於報効殆無一事之可  
言惟寵利人情之所懷惟聖明仕者之難遇自念支離  
之久且多餐冒之慙廉恥之思豈獨畏清議而已滿盈

之戒實亦有私意在焉屢剴惓誠決期引謝天慈過厚  
鄙志莫伸尚聯徽省之班仍玷殊庭之職官責之所不  
及人事之所至安衆共稱榮臣實知懼念顙天之屢瀆  
姑就次以為恭俯仰深惟捐糜曷稱此蓋皇帝陛下道  
周謨典化格範圍取人以身盡物之性九德以之咸施  
四維於焉並育臣敢不歌福祿以崇君親因榮幸以循  
名節庶完終始無累生成

再陳乞致仕表

七十致仕禮有常經再三上言情非虛飾

中謝

伏念臣早

塵顯仕才本空疎荐歷要途事無稱紀幸邁寶圖之肇  
啓預聞玉几之道揚首承日月之光先沾河海之潤特  
蒙褒舉迴出等夷虛被寵靈訖微報稱久從外補遂迫  
頽齡致章紱以上還丐筋骸而歸盡陛下矜憐庸朽寬  
屈典常加使領於祠宮俾便安於鄉社臣感戀德澤難  
以固辭留連衰遲體此深養坐糜厚祿行復二年誠恐  
一朝溝壑之虞遂成終身負乘之恥逮茲耄得以自

陳伏惟皇帝陛下天施無私父慈均篤出處之際既曲盡於恩榮進退之間得粗全於名節屏伏閭里詠歌聖時行葦無牛羊之憂蒲柳免風霜之患嚮用五福式彰皇極之隆國有四維少穆民風之厚

詔

省所上表陳乞致仕事具悉卿國之耆艾時資典刑內領祠宮外居里閭不嬰以事固足養安乃復抗章遂求解組徒欲遺於榮祿良未協於眷懷雖知懇誠難徇來

請所乞宜不允故茲詔示想宜知悉夏熱卿比平安好  
遣書指不多及

第二表

近上表乞致仕蒙聖恩降詔不允者切以大君保息之  
慈人之老者疾者得所養治國經常之制士之進者退  
者惟其宜不堪陳力之勞爰上乞骸之請詔函下降天  
旨未俞中謝臣聞委質大方前經明訓自古不得謝者在  
禮雖或有之然皆德業高賢功勲夙望邦家倚以為重

中外賴之為安加恩所以特優被寵誠為無愧是以義  
全大體衆罔間言如臣徒以空疎早蒙簡擢事猷弗逮  
報稱茂施遽及衰疲遂求引罷而更濫當渥命遙領真  
祠位陪執政之班祿倍大夫之秩職優靡預官責不加  
上忝曩章俯慙私倖敢循舊典謹復自陳伏惟皇帝陛  
下一氣均私大圓丕冒匹夫自盡各伸所志之微萬物  
由庚皆受曲成之賜俯諒虔勤之懇特垂開可之恩精  
驚紫宸猶結望雲之戀迹還白社終懷樂聖之心



詔

省所再上表陳乞致仕事具悉卿逢時特起歷事三朝  
直諒多聞可謂成德比緣請外勉徇均勞旋解宮符遙  
涖祠館優游鄉社幾同佚老之歸輔養天和何待潔身  
而去累章來上殊拂予聞姑體眷懷務安厥位所乞宜  
不允故茲詔示想宜知悉夏熱卿比平安好遣書指不  
多及

第三表

臣昨再上表乞致仕伏蒙聖慈降賜詔書不允者章達御前至誠上徹恩加望外再請未從顧惟衰朽之年以切優安之地祇膺異數益不遑寧

中謝

臣聞事君之方本

取精神之用行己之義當思名節之存壯而不勉則非忠老而不歸則忘恥今臣心力日耗耳目加昏謝事之期已逾三歲瞻天瀝懇蓋亦累年且士之立朝古有垂訓四十曰強而仕七十曰老而傳非異稟之粹靈必同倫於荒耄坐縻重祿虛占近班偃息在床優游卒歲進

退非據俯仰厚顏衆將謂何沒有遺恨伏惟皇帝陛下  
金玉百度紀綱四方元首股肱既熙萬事奔走先後各  
効所長在臣去留奚繫輕重蓋年及而引去人臣謂之  
令終禮得而許歸人君所以加惠仰希慈造濬發俞音  
國制坦明式遂區區之分王道正直益恢蕩蕩之風生  
成亭育之仁始卒保全之賜撫心殞咽之死靡它

致仕告詞

勅凡內外羣工許其謝事而去者咸進秩一等是於優

賢佚老之義亦無所缺矣至者艾大臣有顯勞成德而朕之所禮重則非殊恩異數不足以稱朕意又可以常比言乎宣徽南院使光祿大夫檢校太傅上柱國清河郡開國公食邑五千八百戶食實封一千三百戶張某宿有重望歷服近班頃在先朝職守禁從屬英考以朕為儲副而親聆德音實視詔草自解政柄久從便安而數奏引年懇上印紱乃命舊使於東宮二品就第對此光渥永介壽祺可特授依前檢校太傅太子少師充宣

徽南院使致仕散官勲封食實封如故仍放朝謝

謝致仕表

今月二十三日左班殿直郭安仁齋賜勅告各一道伏  
奉聖恩授臣太子少師依舊宣徽南院使致仕者引年  
謝事錫命自天以徽省之近司加儲闡之崇品祇承詔  
檢榮觀綸綍之辭知自宸衷曲被寵光之渥蒙恩至厚  
震魄無容中謝伏念臣器慮迂疎材資淺薄踐揚通顯叨  
逾四紀之長陟降光明忝覩三朝之盛聖神續御邦國

惟新屬當訪落之辰濫預其難之舉遽罹家釁越去朝  
班因違戶牖之嚴荐易褰畿之守遂嬰犬馬之疾寢迫  
桑榆之期上列奏封蓋謹循於禮典俯頒細札爰深示  
於眷懷特授祠官俾安鄉社又仍歲律當復自陳祇荷  
天慈獲從私志臣子再三之黷顧不容誅君父覆載之  
恩孰與為大此蓋皇帝陛下至慈鞠育大德生成始終  
為之保全進退免其咎悔簪履敝物猶矜惻於棄遺名  
器至公用顯章於優異但今嗟於衰暮訖莫報於鴻私

共戴一天均在照臨之下同居萬彙豈離造化之中

免宣徽使表

今月十五日進奏院逋到告一道伏蒙聖恩授臣宣徽  
南院使檢校太傅依前太子太保致仕降命自天恍日  
星之下燭跼身無地凜淵谷而若驚恩出殊常義難虛  
受

中謝

伏念臣器資本薄材用無長時幸邁於昌辰仕早

塵於近綴荐揚中外曾固著於事功孤立朝廷實粗循  
於分守頃引年而得謝蓋倦飛而知還退處田廬遂經

歲籥仰聖神之並化揭日月以合明豈期綸綍之光忽  
及衡茅之下徊徨自失愧惕交懷此蓋皇帝陛下大德  
施生至仁丕冒播九功而惟叙致萬物於由儀一氣發  
春槁木成於萌蘖大雲布雨潤澤接於潢汙顧茲耄殘  
亦霑亭育然再念臣名除班籍跡遠闕廷事匪遑寧理  
當自列慈衷圖舊迺聖王之所行小節不踰亦匹夫之  
為諒曲頌寵渥曷敢欽承伏冀寢停庶安微陋

第二表



伏蒙降到詔勅一道以臣辭免恩命不允者天鑒蓋高  
微誠未徹王言作命諄誨如聞夫何疎外之蹤亦預僉  
俞之議數斯上黷但積戰兢中謝伏以宣徽兩院之名廁  
於執政二府之重職業無實班秩甚崇中間廢停蓋緣  
官制今茲復置以待賢勞豈謂龍光遽加散冗惟朝恩  
之誤及豈愚分之所堪此蓋皇帝陛下百度允脩九德  
咸事大中之福用敷錫於庶民不宰之功以曲成於萬  
物如臣者忝塵最久倖會居多及茲大耋之年安然泰

寧之世纖埃無補於國一毫罔迫於民敢於草莽之中  
自稱簪履之舊乃今瀝懇而有請猶是為身而圖全仰  
冀高明特垂矜察典刑大法不虧立政之方名器至公  
免累假人之慎特回寵渥昭示邦彛

第三表

伏蒙聖慈以臣辭免恩命再降詔書不允臣聞慎出令  
者邦國之憲章知守節者士人之義分難避聰明之黷  
瀝陳肝膽之誠

中謝

切以舊置宣猷秩均近輔比還使職

蓋待材勞詔旨經年除書未再而臣頃緣衰老久遠朝  
班退伏田廬寢更歲歷無功德於平日徒安樂於聖時  
退省其私中切自幸深懼滿盈之戒粗安止足之懷豈  
渝率履之常上致假人之義伏望皇帝陛下天光下燭  
人欲不違察其孤衷矜其微志特頒眷旨回復誤恩使  
臣保犬馬之餘年全桑榆之頽景考終厥命無愧於心  
則日月之輝天地之施生成之賜淪骨

闕

免宣徽使劄子

臣伏奉詔書以臣三上表辭免恩命不允仍斷來章臣切以先王建官分職所以延俊又崇名重秩所以旌勞能此乃治世之具立國之基幹也本朝宣徽使無所任於事為待材用之宅中緣官制而罷既而復還其任蓋廟堂之議事存本末臣既退老多年雖曾經此職今則非復任用之人寵渥忽及自度虛受無名屢黷聖聽不敢承命三代之盛王未有遺年者歷世明君優恤耆艾以為令典恭惟二聖德義出於此然人臣之節一介之

守區區孤陋亦有所志今夫聖王之事陛下既已行一  
介區區之守臣亦願終其履踐焉敢妄意苟得以干物  
論伏望天日高明特垂降鑒庶於朝廷大公之體粗有  
補於涓埃

謝免除宣徽使表

伏奉詔書以臣上劄子辭免恩命特蒙聖慈允所請者  
切以惟皇建極置器以安恩福以發其光榮憲度以成  
其嚴重必使人而知分實為國之大經故得俊民用章

百揆時叙

中謝

伏念臣委質四朝之盛及今大耋之年罔

著事功靡一毫而報上偶逃罪惡幸無忝於所生退處  
田廬倏逾歲紀豈意桑榆之末忽承天日之光命出殊  
常魂驚失措力陳微懇實內激於肺肝仰冒明威蓋自  
甘於斧鉞伏惟皇帝陛下至誠成物大德得人德義之  
興本出民風之厚典刑所載良資王道之平豈惟孤陋  
之身可當謨訓之美

授太子太保謝表

伏奉今月某日告命授臣太子太保者成命已行義難

辭避無功虛受愧益面顏

中謝

伏念臣早依日月之光退

迫桑榆之景杜門屏迹已安灰槁之餘送往事居無復  
分毫之効敢期新寵例及陳人此蓋伏遇皇帝陛下哲  
命初基舊章畢舉嘉與羣賢之共治聿追列聖之貽謀  
雖零雨時風無所揀擇於物而枯草腐木難報生成之  
恩

又

伏奉今月某日告命授臣太子太保者渙汗所均一新

中外逮遷之澤例及衰殘

中謝

伏念臣歷事累朝叨塵二

府少壯之日已不逮於衆人艱難之時又退安於末路  
有何功績冒此寵榮此蓋伏遇太皇太后陛下美化財  
成至仁涵育荷宗廟之重託極神人之歡心大覃曠世  
之恩求助嗣王之德而臣老病所迫報効無時惟當教  
忠於子孫庶幾無負於天地

遺表



臣聞生也有涯況叨蒙之過分死之將至猶感戀於存懷輒鳴臨絕之音仰黷蓋高之聽

中謝

伏念臣立身孤介

遭世休明早習藝文自託聖人之道粗持為守以近天子之光塵忝高華踐揚中外雖其經國之遠業無稱於時至於事君之大方敢愆於義鐘漏向盡田廬有安惟大期之既窮念鴻私之難報伏惟皇帝陛下體均洪覆神凝太清尊若北辰乘璣衡而不動安如厚地容河海以成深時萬斯年如一之日自惟殘迫方永謝於明時

獨此丹誠豈可埋於幽壤

免南郊陪祠表

伏奉詔勅令發來赴闕南郊陪位者郊廟親祠國家大事百辟咸在有懷舊臣明詔及門許陪盛禮顧衰體之疲朽承寵命以震驚中謝伏念臣頃荷天恩出司留鑰榮

歸鄉國理極便安年迫桑榆義當休息飛章請老本慙賢路之妨不稼取禾更積素餐之愧恐再三之上瀆終忝冒以不遑然而夙苦目痾比頻發動近加末弱殆不

支持方陛下咸秩百神駿奔萬國思以自天之福祿均  
畀在位之臣工惻然眷懷未忍遺棄而臣自顧殘瘥之  
質恐成跛倚之尤身滯周南信榮觀之有命心游魏闕  
念入侍之為難惟當望柴燎之餘煙伏敝廬而切抃坐  
馳丹悃仰企清光媮情之誅逃避無所

免南郊陪祠劄子

臣伏被詔勅令發來赴闕南郊陪位已具表稱謝及陳  
情懇附奏訖切念臣早以庸虛上塵眷遇昨知應天府

引年謝事備瀝微悃仰蒙宸恩就除官使竊祿自便每不自遑退就私居纔逾時月天慈記錄又加特詔愧甚失措感深隕泣誠願榮陪盛禮因得一覩清光此時不入國門便是永填溝壑但臣夙患目疾每發良苦近因退閒方專治療攝心收視冀復精明仍自夏秋足膝少力雖不妨行步而難為久立儻若可趨班著固當不俟駕行今此阻難彌用悼恨望雲極目向日傾心形骸徒存神爽飛越敢披愚鄙上達聖聰謂天蓋高矜此跼蹐

謝免南郊陪祠表

伏奉詔書許臣免赴南郊陪祠者天眷優隆不遺舊物  
老身衰病辜奉明恩未即譴尤重加慰諭

中謝

伏惟皇帝

陛下奉若天地祇事祖宗罄萬國之歡心洽百禮而為  
奉四海來格尚何有於匹夫誠意旁周獨未忘於一介  
其為幸會上出眷懷况臣仕歷三朝班聯二府固合勉  
強筋骸之力奔走籩豆之間聽上祝之告休均在庭之  
率舞顧以迫於罷曳豈敢苟於便安始効私誠謂嚴誅

之莫遑重邀細札識聖度之兼容雖蒲柳之質既衰而  
葵藿之心未已瞻望隕越寢興不遑

免南郊陪位表

伏奉詔勅令發來赴闕南郊陪位者國之大事禮行於  
郊在位羣工肅祭容之嚴翼有懷舊老仰天眷之優隆  
顧疲朽之殘軀惟震驚於寵命中謝伏念臣久安鄉社已  
迫桑榆雖優佚於盛時日侵尋於衰病目痾增眊但馳  
想於闕庭末弱難支實艱趨於壇墠方陛下恭承圭幣

嘉薦豆邊四方駿奔萬福來下欲其敷錫弗忍遐遺而  
臣自顧疋癘之姿恐成跛倚之失侍祠拱帝難參會升  
之星抱瘵卧廬徒望升煙之燎坐馳丹悃仰企清光媿  
情之誅逃避無所

賀南郊禮畢表

伏見今月二十七日南郊禮畢大赦天下者惟聖為能  
饗帝莫大於卜郊好生之德洽民茲謂之大德中謝臣聞  
天地萬物之始祖宗百世之先書有肆類之文禮著嚴

配之義曠三年而後舉周四海以薦誠然後精意獲通  
萬靈咸秩惠澤迨於列辟賜予均於六師自非熙辰曷  
修盛節伏惟皇帝陛下仁孝昭格叡知日躋克享天心  
以作神主故能普安寧於八表効職貢於殊方釐事告  
成舊章益茂臣忝逢明代獲綴近班觀陟降之多儀阻  
陪祠位被厖鴻之純嘏徒仰天光遙望闕庭實深慶抃  
謝加恩表

元祀告成鴻恩溥及雖在退藏之品猶加異數之榮祇



奉絲綸實增慙懼

中謝

伏惟皇帝陛下竭誠致饗受祿自

天樂與羣臣同霑大慶上自股肱之列下周筦庫之微  
嘉其顯相之勤錄其駿奔之助霑然大賚夫豈無名如  
臣草木餘生桑榆暮景顧田廬而願逝竊秩祿以常驚  
多病支離已無任於陪祀寵光霑洽尚不聞於推恩荷  
德滋深論報無所

免明堂陪位表

今月二十三日伏奉詔勅以明堂大禮今發來赴闕陪

位者伏以大饗之禮蓋崇於宗祀至孝之誠莫重於嚴配盛節斯舉惟聖為能既被闡於典章尚不遺於耆老

中謝

伏念臣退歸鄉社久遠禁塗雖優佚於明時日侵尋於衰病目痾增眊但馳想於闕庭末弱難支實艱趨於軒陞伏惟皇帝陛下恭承圭幣嘉薦豆籩四方駿奔萬福來下欲其敷錫弗忍遐遺而臣自顧尪癯之姿恐成跛倚之失侍祠拱帝難叅會弁之星抱瘵卧廬徒望升煙之燎坐馳丹悃仰企清光偷情之誅逃避無所

又

伏奉今月二十三日詔勅以明堂大禮令發來赴闕陪  
位者國家大事祀典為先况茲饗帝之嚴實舉配天之  
禮百辟咸在有懷舊臣明詔及門許觀聖節顧殘骸之  
疲朽承寵命以震驚

中謝

伏念臣早荷朝恩老歸鄉社坐

縻廩祿無益涓埃夙苦目痾比頻發動近加末弱迨不  
支持伏惟太皇太后陛下咸扶百神駿奔萬國思以自  
天之福下均率土之濱惻然眷懷未忍遺棄而臣自顧

廷燎之質恐乖恭肅之儀身滯周南願瞻仰而莫及心  
游魏闕念入侍之為艱敢冀宸慈特垂矜允上虛明命  
難追嚴誅

免明堂陪位表

伏奉詔書以明堂大禮令赴闕陪位者明德惟馨方格  
神於盛禮相予肆祀猥賜詔於老臣衰朽知榮兢惶靡  
措中謝伏惟皇帝陛下嗣隆聖統躬致太平翼翼文王之  
小心烝烝虞舜之大孝季秋順序方萬物之盛多四方

和來嘉多士之奔走祇見列聖裒對昊穹敝布政之法  
宮大明禮樂受丕天之景貺均被邇遐喜交神人慶洽  
夷夏允執事豆籩之末或觀光輿隸之間足為至榮可  
以無恨而況臣早已屏退尚叨記存溫詔在門外庭有  
位固願聞舜韶而率舞瞻堯日以傾心遲暮之餘衰疲  
且久當千歲之接統自滯周南奉半夜之受釐莫趨宣  
室無階策勵惟劇飛馳

又

合宮備禮方歲事於季秋列位侍祠尚不遺於故老仰  
恩榮之優異循哀瘵以戰兢伏惟太皇太后陛下聰明  
自天博厚載物左右景命固大濟於艱難保育神孫既  
聿躋於齊聖邦家康靖朝野肅清頌德告功既對天而  
不忤隆禮備樂念報本之惟時當魚麗之世而物既盛  
多由思齊之聖而神用昭格擁純禧於二聖肆大賚於  
萬方曠古上儀于今盛典臣久辭屏著退伏里閭覩聲  
明於垂盡之年受德澤於惟新之政顧餘齡之已幸矧

溫詔之見臨是宜策勵造廷齊明就列與其失周士在  
廟之敬不若同堯民擊壤而歌文物莫瞻夢有均天之  
想精誠未已心為魏闕之遊

謝男某差遣表

命行予奪之間茲為君柄事守章程之細則有司存允  
出殊恩謂非常制不有宜稱是虛寵靈

中謝

伏念臣早遇

聖明嘗蒙親近仰承眷遇實有異於等倫自念衰殘顧  
難當於注意幸分符鑰因就田廬歿歸狐首之丘生奉

豚肩之祀上託至仁之化遂忘大耋之嗟猶舐犢以嬰  
懷爰拂龜而有請輒干明格方待嚴誅伏惟皇帝陛下  
治用孝慈德隆穹厚不期舊物仍記於堯心豈謂塵容  
尚存於舜目淵衷矜惻特旨可從宸造屬於老臣私便  
及於愚息九天降澤霽霽接於源流一氣發春榮潤均  
於根葉莫伸報塞但積愧惶葵藿至微徒有心於向日  
潢汙且涸固無路以朝宗想望闕庭飛越精爽

薦龔懋應詔表



伏聞人主大柄在乎攬髦俊人臣大節在乎建功名況  
常有為之時尤急非常之士伏見應茂材異等科龔懋  
研究歷代之故通習諸家之說材略可使從政智筭可  
以慮事向嘗應詔再召延閣有司所病不及大對羈旅  
益困操守無虧今邊略未寧謀能為急有如懋者士林  
之擇如使在野茲為遺賢臣今舉其人堪叅謀帷幄之  
舉如蒙甄錄試任無効臣甘准詔書連坐之罪

代人自外郡除待制表

范文正公

今日日遞到官告一道蒙見授前件官者省署清曹禁  
廷近職忽外除於散地知上出於宸衷

中謝

伏念臣藐爾

孤生邁茲盛世竊慕匹夫之諒誓守平生之心暨忝列  
於冠裳每感激乎忠義頃值陛下躬親聽斷始初清明  
登用俊良旁逮疎賤擢從郡倅陞列諫垣誓輸肝腸以  
報恩遇有聞無隱盡芻蕘之鄙言淺智深謀昧朝廷之  
大體寬恩外補支郡假麾未易炎涼遽遷會劇歲水潦  
之為敗民力食以方艱求寬常祖議導壅水陳章請而

煩復輒恩旨而可從睿澤周隆編氓蘇息在臣愚劣何  
術保綏夙宵勉勤曠敗是懼豈謂江湖之上遽蒙日月  
之光詔命忽臨寵名非次大邦多士清朝富才上簡帝  
心豈少臣比感深泣下愧甚魂驚此蓋陛下仁及隱微  
德施溥博虛懷小善來天下之魁英借寵孤臣勵朝端  
之風節揆能不敏思報何階惟當白首初心黃泉一節  
仁思反哺庶堅鳥鳥之心義不逃生無惜螳螂之臂



樂全集卷二十九